



## D GNIESSER 2018

### **Sujet: Glooge ! Glooge ! Glooge !**

S nüünt Gebott verbietet s Liege;  
soo stoot s in dr Biible, scharf.  
D Wooret soll me nit verbiege  
wil me das uff kai Fall darf !

Ainewääg wird ständig glooge,  
jeede Daag und jeedi Nacht,  
sodass mir alli uns mien frooge  
wieso men ainewääg das macht ?

Glooge wird vo frieh bis spoot  
vo Kind und Frau und Maa.  
Und wenn s halt gar nit anderscht goot ?  
...denn liegt me sich halt aa...

Mänggmool liege d Lüüt uus Noot,  
mänggmool zem aig'ne Schutz;  
Doch was bim Liege gaar nit goot  
isch e Luug uus Aigenutz !

S git Lüüt, die liege ganz spontaan  
(Die Arme UND die Ryyche);  
E Dail däa liegt uus Grössewaan  
zem Vordail sich z erschlyche.

Glooge wird dr lieb lang Daag  
im Gschäft und au privaate;  
Und s liegt mit jedem Stundeschlaag  
uns aa dr Babbe Staat.

Politiker dien vvyll verspräche,  
vor allem VOR de Wahle;  
Doch oft dien sii s Verspräche bräche  
und s Volgg muess Lehrgäld zahle.

Kuum isch ain gwählt als Bundesroot,  
duet d Ehrlikait verfliege;  
Är schwöört – und wird drbyy nit root –  
"Ich wird im Amt nie liege !"

D Diskussion um d Ärd-Erhitzig  
syg hailoos überzooge,  
doch s Schlimmschte draa und gar nit witzig:  
In däm Fall isch s NIT glooge.

Au z Dütschland liege sii und saage,  
dass d Auto suuber fahre;  
Hüt waiss me dangg de vvytle Glaage:  
S kunnt Drägg uus jeedem Kaare.

VW-Diesel, BMW,  
die mache vyyl z vyyl Drägg,  
doch d Diräggtion in corpore  
die liegt das glatt ewägg.

Sportler gänn uns luut bekannt:  
"Y haa nie Doping gschluggt !"  
Derbyy hänn die in jeedem Land  
Pille kilowyys verdruggt.

S wird glooge in dr Partnerschaft,  
me macht sich öbbis vor;  
Das koschtet Drääne und au Graft,  
bestimmt ganz vyyli Joor.

E Maa, däa liegt bi syner Frau,  
är wurd sii immer liebe,  
drbyy duet är – wie and'ri au –  
in fremde Köörbli iebe.

Oft liegt me scho am Trau-Altar:  
"Bis dass dr Dood uns schaidet !"  
Doch oft isch das denn vyyle Paar  
scho nach weenig Joor verlaidet...

Und mien mir d Stüüre deklariere  
mien mir uns zämmerysse,  
dass mir uns joo nit dien Trump-iere  
und höggschtens ganz lyucht bschysse

Glooge wird wie druggt am Zoll,  
woorschyynts vo alle Lüüt;  
Denn alli saage unschuldsvoll:  
"Z verzolle ? ...hämmmer nüüt..."

S wird gschwindlet au bi Altersfrooge;  
Au d Fraue liege flyssig,  
denn vyyl vo ihne – s isch nit glooge –  
sinn zwanzig Joor lang "dryssig"...

Nur ain, wo immer d Wooret sait,  
griegt s "Ehrligkaits-Diploom".  
Är ghöört zer Kirche-Oobrigkait:  
Dr Pontifex in Rom...

Mir wünschen uns dr Hoofnaar zrugg,  
dä, wo in aller Offehait  
nit liegt und düttlig ohni Drugg  
uns immer d Wooret sait !